




REPUBLIKA E SHQIPËRISË

KOMISIONI I PAVARUR I KUALIFIKIMIT



NR. 3 AKTI

NR. 1 VENDIMI

Tiranë, më 08.02.2018

VENDIM

Trupa gjyquese e Komisionit të Pavarur të Kualifikimit, e përbërë nga:

Brunilda Bekteshi	Kryetar
Etleda Çiftja	Anëtar
Genta Tafa (Bungo)	Relator

asistuar gjatë procesit të vendimmarrjes nga sekretarja gjyqësore Olsida Goxhaj;
pas shortimit të shpërndarjes së çështjes dhe caktimit të kryetarit dhe relatorit, sot, më datë 08.02.2018, ora 14:00, në sallën nr. 2 të selisë së Komisionit të Pavarur të Kualifikimit, mori në shqyrtim, mbi bazë dokumentesh, çështjen që i përket subjektit të rivlerësimit:

Z. BESNIK BABAÇE IMERAJ - Anëtar i Gjykatës Kushtetuese të Republikës së Shqipërisë

BAZA LIGJORE : Neni “G” i Aneksit të Kushtetutës së Republikës së Shqipërisë;

Neni 127 i Kushtetutës së Republikës së Shqipërisë;

Nenet 14 dhe 57 të ligjit nr.84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”;

Neni 9/1-c i ligjit nr.8577, datë 10.02.2000, “Për organizimin dhe funksionimin e Gjykatës Kushtetuese të Republikës së Shqipërisë”, i ndryshuar me ligjin nr.99/2016 dhe Vendimi nr. 78, datë 12.12.2017, i Gjykatës Kushtetuese.

Rrethanat e çështjes:

Subjekti i rivlerësimit, Z. Besnik Imeraj, përgjatë periudhës së procesit të hetimit administrativ ka ushtruar detyrën e gjyqtarit në Gjykatën Kushtetuese dhe si subjekt rivlerësimi, i është nënshtruar rivlerësimit *ex officio*, në bazë të pikës 3, të nenit 179/b, të Kushtetutës së Republikës së Shqipërisë.

Në referim të pikës 4 të nenit 4 të ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, subjekti i rivlerësimit, z. Besnik Imeraj, anëtar i Gjykatës Kushtetuese të Republikës së Shqipërisë, u është nënshtruar procedurave të rivlerësimit me përparësi në kohë, duke u shortuar si subjekt rivlerësimi me shortin e hedhur më datë 06.11.2017 nga Komisioni i Pavarur i Kualifikimit, në përputhje me “Rregulloren për procedurat e zhvillimit të shortit në Komisionin e Pavarur të Kualifikimit”.

Në mbledhjen e trupës gjykuese të datës 14.11.2017 u deklarua mungesa e konfliktit të interesit nga anëtarët e trupës gjykuese, si dhe u vendos fillimi i hetimit administrativ.

Konstatohet se subjekti i rivlerësimit, Z. Besnik Imeraj, është emëruar anëtar i Gjykatës Kushtetuese me Dekret të Presidentit të Republikës së Shqipërisë nr. 8066, datë 22.03.2013. Kuvendi i Republikës së Shqipërisë, me Vendim nr. 7/2013, datë 01.04.2013, ka dhënë pëlqimin për emërimin e tij si anëtar i Gjykatës Kushtetuese. Më datë 08.04.2013, zoti Imeraj ka bërë betimin para Presidentit të Republikës.

Arsyet për ndërprerjen e procesit të rivlerësimit për subjektin e rivlerësimit

Subjekti i rivlerësimit, Z. Besnik Imeraj, ka dhënë dorëheqjen më datë 31.01.2018, duke shfrytëzuar të drejtën që i jep ligji për dorëheqjen nga detyra. Me Vendimin nr.2, datë 31.01.2018, “Me objekt deklarimin e mbarimit të mandatit të anëtarit të Gjykatës Kushtetuese, zotit Besnik Imeraj”, Gjykata Kushtetuese ka deklaruar mbarimin e mandatit të subjektit të rivlerësimit. Ky vendim ka hyrë në fuqi menjëherë, duke u botuar në Fletoren Zyrtare, bazuar në pikën 2 të nenit 132 të Kushtetutës.

Me shkresën nr. 64/1 prot., datë 31.01.2018, Gjykata Kushtetuese vë në dijeni Presidentin e Republikës së Shqipërisë lidhur me mbarimin e mandatit të anëtarit të Gjykatës Kushtetuese, Z. Besnik Imeraj. Institucioni i Presidentit të Republikës së Shqipërisë, me shkresën nr. 237/1 prot., datë 08.02.2018, protokolluar në Komisionin e Pavarur të Kualifikimit me nr. 1652 prot., datë 08.02.2018, ka dërguar për njohje shkresën e Gjykatës Kushtetuese nr. 64/1 prot., datë 31.01.2018.

Procesi i rivlerësimit nga ana e Komisionit të Pavarur të Kualifikimit është një proces kushtetues, që mbështetet në nenin 179/b të Kushtetutës dhe kryhet me qëllim që të garantohet

funksionimi i shtetit të së drejtës, pavarësia e sistemit të drejtësisë, me synim rikthimin e besimit të publikut tek institucionet e këtij sistemi.

Ky proces nënkupton ngritjen e një sistemi rivlerësimi për subjektet e parashikuara në nenin 179/b/3 të Kushtetutës dhe përfshin të gjithë gjyqtarët, duke përfshirë gjyqtarët e Gjykatës Kushtetuese dhe të Gjykatës së Lartë; të gjithë prokurorët, duke përfshirë Prokurorin e Përgjithshëm; Kryeinspektorin dhe inspektorët e tjerë pranë Këshillit të Lartë të Drejtësisë, të cilët i nënshtrohen rivlerësimit *ex officio*.

Neni G i Kushtetutës së Republikës së Shqipërisë ka parashikuar dorëheqjen e subjektit të rivlerësimi:

1. *Subjekti i rivlerësimi mund të japë dorëheqjen nga detyra dhe në këtë rast procesi i rivlerësimi ndërpritet.*
2. *Subjekti i rivlerësimi që dorëhiqet sipas kësaj dispozite, nuk mund të emërohet gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare.*

Neni 56 i ligjit nr. 84/2016 “Për rivlerësimin kalimtar të prokurorëve dhe gjyqtarëve në Republikën e Shqipërisë” ka parashikuar mundësinë e dorëheqjes së subjektit të rivlerësimi si vijon:

1. *Subjekti i rivlerësimi ka të drejtë të japë dorëheqjen nga detyra jo më vonë se 3 muaj nga hyrja në fuqi e këtij ligji. Dorëheqja i paraqitet me shkrim Presidentit të Republikës dhe publikohet në faqen zyrtare të internetit të këtij institucioni. Në rastin e dorëheqjes, Komisioni merr vendim për pushimin e procedurës së rivlerësimi.*
2. *Pas dhënies së dorëheqjes, subjekti i rivlerësimi ka të drejtë të përfitojë pagesë kalimtare, sipas nenit 7, pika 1, të ligjit “Për pensionet shtetërore suplementare të personave që kryejnë funksione kushtetuese dhe të punonjësve të shtetit”.*

Vendimi nr. 78, datë 12.12.2017, i Gjykatës Kushtetuese, paragrafi 43, ka interpretuar, ndër të tjera, lidhjen ndërmjet këtyre dy dispozitave si vijon:

“[...] Neni 56 i ligjit i jep mundësinë subjektit që dorëhiqet brenda afatit 3-mujor të përfitojë pagesë kalimtare sipas parashikimeve ligjore në fuqi, mundësi të cilën nuk e përfitojnë subjektet që e japin dorëheqjen pas përfundimit të këtij afati. Gjykata thekson se, për sa kohë që subjekti i rivlerësimi është në detyrë dhe procesi i rivlerësimi nuk ka përfunduar ende, ai ka të drejtën të japë dorëheqjen dhe në këtë rast procesi i rivlerësimi ndërpritet, duke u zbatuar parashikimet e nenit G të Aneksit të Kushtetutës.”

Referuar nenit 127 të Kushtetutës: “1. Mandati i gjyqtarit të Gjykatës Kushtetuese mbaron kur: [.....] c) jep dorëheqjen;”, ndërsa pika 2 e këtij neni parashikon: “Mbarimi i mandatit të gjyqtarit të Gjykatës Kushtetuese deklarohet me vendim të Gjykatës Kushtetuese”.

Ndërprerja e procesit të rivlerësimit për shkak të dorëheqjes së subjektit të rivlerësimit sjell si pasojë përfundimin e kësaj procedure administrative dhe, si rrjedhojë, ai humbet të drejtën për t'u emëruar gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare, sipas parashikimeve të pikës 2 të nenit G të Aneksit të Kushtetutës.

PËR KËTO ARSYE:

Trupa gjyqese e Komisionit të Pavarur të Kualifikimit, mbështetur në nenin G të Aneksit të Kushtetutës së Republikës së Shqipërisë, si dhe në nenin 57 të ligjit nr. 84/2016 "Për rivlerësimin kalimtar të gjyqtarëve dhe prokurorëve në Republikën e Shqipërisë",

V E N D O S I:

Të deklarojë se procesi i rivlerësimit kalimtar të anëtarit të Gjykatës Kushtetuese, Z. Besnik Imeraj, është ndërprerë.

Ky vendim u njoftohet subjektit të rivlerësimit, Z. Besnik Imeraj, Komisionerëve Publikë dhe Operacionit Ndërkombëtar të Monitorimit.

Ankimi kundër këtij vendimi duhet t'i drejtohet Kolegjit të Posaçëm të Apelimit nga subjekti i rivlerësimit dhe/ose Komisioneri Publik, 15 ditë nga data e njoftimit të vendimit dhe duhet të dorëzohet pranë Komisionit të Pavarur të Kualifikimit.

ANËTARËT E TRUPËS GJYKUESE

BRUNILDA BEKTESHI

Kryetare

ETLEDA ÇIFTJA

Anëtare

GENTA TAFA (BUNGO)

Anëtare

Ky vendim shpallet në datën 08.02.2018

